

懷寧縣志卷三十四

雜記

志之作記地記人記事記言不外發先德之幽光示後人以涉世持身之正軌也各以類從各有專目其目無所繫事有足傳近代方志多隨筆摭摭或名雜記或名摭佚識小義也道光志有雜記一卷同治志將應列以前各目者按類移易餘未編輯今照錄道光志間有無關勸懲者未敢率除補首一條遵同治志序例也增輯五條不矜廣博終之以懲奸勸孝所期望於將來者遠且大此續纂是書之微意也後之君子或有取焉

漢左慈字元放廬江人也少有神道嘗在司空曹操坐操從容

顧衆賓曰今日高會珍羞略備所少吳松江鱸魚耳元放於下坐應曰此可得也因求銅盤貯水以竹竿餌釣於盤中須臾引一鱸魚出操大拊掌笑會者皆驚操曰一魚不周坐席可更得乎放乃更餌釣沈之須臾復引出皆長三尺餘生鮮可愛操使目前鱸之周浹會者操又謂曰旣已得魚恨無蜀中生薑耳放曰亦可得也操恐其近卽所取因曰吾前遣人到蜀買錦可過敕使者增市二端語頃卽得薑還并獲操使報命後操使蜀反驗問增錦之狀及時日早晚若符契焉後操出近郊士大夫從者百許人慈乃爲齋酒一升脯一斤手自斟酌百官莫不醉飽操怪之使尋其故行視諸鑪悉亡其酒脯矣操懷不喜因坐上

欲收殺之慈乃卻入壁中霍然不知所在或見於市者又捕之而市人皆變形與慈同莫知誰是後人逢慈於陽城山頭因復逐之遂入走羊羣操知不可得乃令就羊中告之曰不復相殺本試君術耳忽有一老羝屈前兩膝人立而言曰遽如許卽競往赴之而羣羊數百皆變爲羝並屈前膝人立云遽如許遂莫知所取焉

據同治志序例
本後漢書補

宋黃幹知安慶府築城成會元曰張燈有老嫗百歲二子輿之諸孫從至府致謝幹禮之命具酒炙且勞以金帛嫗曰老婦之來爲一郡生靈謝耳太守之賜非所冀也不受而去

見宋史

鐵牛舊志云四處江滸多水怪初築城時冶鐵鎮之一統志云

鐵牛在府城太平寰宇記言漢書地理志皖有鐵官鑄鐵作牛埋於城北十步以鎮北齊皇建二年刺史王洪遣掘鐵牛遂輦入城未鎔鑄於時城中人馬多疫巫覡曰鐵精爲祟遂使人送牛本處府志云凡五處一集賢門內一盛唐門內一山川壇東一天柱閣右一萬億倉俱藏土中微露牛脊時有聞喘聲者驚其異稱爲鐵牛大將軍按漢皖縣乃灑山今府城宋嘉定中築漢時鐵牛不得云在府城也

練公子寧嘗過安慶謁余忠宣祠有詩云將軍忠節冠荆揚千載精神日月光血戰孤城身已殞名垂青史汗猶香殘碑墮淚空秋草折戟沉沙自夕陽我亦有懷追國土爲君慷慨奠椒漿

識者知其必以忠顯見趙喆士寄園寄所寄

暘明庵在冶塘西明內翰顏素給諫宣國柱皆嘗讀書於此顏極貧暑月不能具帳當露宿僧雛夜聞鬼語其一曰憊矣汝當代其一曰我輩爲彼驅蚊他日貴未必以一盃相酌也其一曰爲一舍人庵主呵護之如此亦甚炎涼其一曰且揮扇毋使蚊啣膚受庵主責僧雛竊以語其師師知顏非常人供給甚至旣顏貴酬之有加焉今此庵歷世相承猶秉遺訓凡讀書其地者未嘗不待以殊禮也

劉方伯尚志子十二人有術者推之云四狀元八進士後若宰得狀元行四若宜成進士行八乃悟術者舉行次而言也

沙塞雷江口狀元從此有劉若宰應焉銅鑼銅鼓下有知府雷

鳴春應焉雷祖墓在銅鑼山術家推測偶然驗耳其餘遺識尙多不必

盡足信也

劉殿撰赴鄉舉時祈籤於社壇嶺土地祠籤云牡丹芍藥逞花紅賽過寒梅與老松艷色眼前誰不愛秋來無子一場空同人以爲不吉劉竟聯捷而得大魁乃悟神云無子則一場皆空已明告以大魁矣又劉北上資斧不足非得某處會金不可而同會者已搖足三十六點點多得會三十點盈數也劉尙睨骰盆不釋同會者曰子能三十七點乎則以讓子劉竟舉益一喝忽一骰裂斷成么餘仍三十六點遂持金去治裝又劉大魁之年三月安慶

有五色雲見若樓閣狀

見舊志
祥異

宣國柱穎敏絕倫爲給諫時嘗以鄉邦文物之盛誇於同列有同列曾爲應天學道者起曰吾嘗過燕子磯共舟四五人皆君珂里士也吾偶指磯邊楊柳命句云燕子磯頭楊柳瘦諸生皆不能對然則所見不如所聞宣曰此陳對耳鷺湖山下稻梁肥故諸生不對同列竟無以難也

王來聘未達時婦家富僚壻三人其二亦富而王獨貧婦翁懸弧之日王隨例修謁筐篚歉薄衣衫襤縷翁以爲辱不令齒於諸壻前堂後寢賀客充盈筵席雜陳觥籌交錯擯王不得與焉妻母憐之命獨置食於樓食王角黍上而忘進箸卽拔已髮上

金剌耳令簽以食妻母去王愠怒簽一角黍食其半擲於盤而起下樓遁次日妻弟至索剌耳王言在盤中角黍上弟曰無之郎君如尙未易米也幸以返吾母王無以自明詣城隍廟誓焉將入門而蹶傷額流血觀者譁然皆以爲復何誓哉神降以竊物罰矣王益不能自明卽日遠竄後寄籍燕京應武科以崇禎辛未狀元及第衣錦歸至婦家婦翁等皆尙在王曰吾此來專爲城隍神也平人誣良罪加等况竊號聰明正直而良莠不辨吾將以某日誓衆討而誅之其夜城隍神見夢曰若知前此入門而蹶之故乎若祿籍當由北方起家不因阨惡能激吾故使功曹蹶若所以促若行也角黍之半藏吾龕下剌耳尙簽其上

待若久矣婦家亦皆夢焉次日發龕視之果如神言乃歎冥漠中之驅策不可思議如此王後於山左殉節

見明史列傳

楊美之少儂首俯至地家故不甚饒忽皖口城隍神降於其家言某日有天劫須朱提五十金投之江中乃免楊卽多方措置屆期至江干順流拋金見者莫不笑其愚駿楊殊不爲動返入廟拈香則金儼在爐中蓋神以此試其誠也嗣是神或數日一至初猶具鬼卒騶從童稚見之驚怖楊請以常儀見許之命於樓上懸一磬磬鳴卽神至矣其家事無巨細必咨神而後行放青歸息聽神之所爲主客或初不識面也楊常以儂爲患請於神問可治否神曰吾不知醫爲丐孫真人思邈真人卽具方令每日清晨向東服至四十九日若有人力蹴其背者骨節一震已挺然木植矣楊居宅嘗有鬼怪神言某日某處有道士賣劍買之可以辟除如其言果得劍七星隱起眞神物也懸於門而怪遂絕又嘗豫告楊以盜至爲書其姓名於牆羣盜見之皆駭愕遁去云

楊都憲汝毅致仕家居桐城張氏其姻戚也學使按臨楊以酒食饗張氏之就試者時張若漣與諸張稍疏遠引嫌不往客人門楊問畢至否乎速客者言尙有某郎君在寓楊命再速之諸張皆代辭楊固不可必俟若漣至始就席極歡而散後若漣亦官都憲常舉此事以誨人云楊公達尊於一窮諸生不忽視所

謂君子無衆寡無小大無敢慢也彼豈逆知余今日之亦居此位乎倘爾時余不往彼遂置之今日且有議其不能相士者矣前輩行己之恭與人之壹卽此等處皆可師法也

徐公士林守皖時題楹聯云非眞枉莫來告狀任憑神謀鬼算聽法堂鼓三敲也要心驚膽落是良民且去種田試看村農野叟住茅屋飯一飽何等夢穩神安又聯云供長生位刊德政碑莫非世俗虛文不知那件事烈烈轟轟堪配龍山皖水挂迴避榜帖盟誓聯都是官場假相只要這點心乾乾淨淨無慚白日青天仁者之人其言藹如皖人至今傳誦

陳從王在培原書院肄業時桐城方侍郎苑予告在籍中丞某

公其門下士也值方七十欲得文以壽請山長爲之時方負海內名學者仰若泰山北斗山長逡巡不敢執筆徧召書院肄業生問有能作者否皆不對陳年最少尙未補諸生起末座自任山長心弗善也旣而文成且姑呈中丞以塞責方一見則大詫閱時來謝中丞首問前日壽序誰所作也中丞以山長對山長以陳對方卽親往拜焉中丞命謙方必得陳生陪餘人弗屑也自是陳名譽不終日徧皖中後乾隆庚午領春秋房解終嘉定學博

楊生輝初赴金陵試卒遇暴風其母驚憂成盲楊遂終身不應鄉舉母病下利澣濯厠踰悉躬親之每遇歲科兩考須數日違

養必召妻孥及僕婢徧拜令朝夕防護母稍懈不如已在家時
孫名昇成進士由刑部郎中出爲黔守人謂純孝之報
康貞士深澤令康雲父其教子讀書也不使一毫與家事嘗六
七月間山雨暴至慶雲出塾於稻場上助收穀貞士撻之曰此
非若所宜問也古有水漂麥而不知者獨何人哉慶雲遂刻苦
自勵成名進士令深澤年未三十而卒時論惜之

王崇文武學生少僮不羈能挽百石弓走及奔馬家住獨秀
山外每清晨至郡城買豆腐歸供早廚暑月愛潛山三祖寺林
木之勝常以返照時著屐納涼更餘而返去來之際百數十里
才俄頃耳子永泰乾隆丁酉科武舉人榜前一日崇文到金陵
觀榜卽返比報者至已泥金高揭矣又飲瞰兼十餘人將遠行
千里外必以斗米飯數十斤肉作一頓食之盡間三五日不食
亦無饑色信奇人也生值承平之世無所用其才老死田間惜
哉

江子泗工奕嘗客遊武昌聞有僧曰練江以奕角財常取贏子
泗僦居其寺竊窺僧與人奕亦中駟耳久之僧謂子泗若能此
乎子泗以願學對僧言三十年來未嘗下空子須得阿堵物爲
楸枰長氣子泗許諾數佯北而償其進僧益自負時時欲得子
泗對奕子泗故不肯僧固強之子泗傾其篋示之曰旅費盡此
矣必欲奕則以此爲孤注僧素易子泗卽曰若願就死僧何怯

焉終局僧負十餘子子泗得百金尙以爲偶然耳次日奕則再負又次日奕則三負後遂無局不負初子泗與僧對子至是僧請讓二子負如故又請讓四子負如故僧乃廣招平生所與奕稱能手者與子泗奕負皆然子泗因治裝辭去曰和尚休矣他日訪僕於皖上耳凡所得於僧及諸能手奕資累千金僧踰歲至安慶遇子泗江干問此間有國手曰江子泗於君奕孰上下子泗曰卽我是也僧熟視良久曰君江子泗耶甚矣老僧之無目也卽詣子泗家從之學留數月盡其技始去

汪儀部德鉞未達時贅於潛山徐氏徐佃某家有狐崇收租之日汪願隨其外舅往觀焉狐已豫知前夕謂所私女曰明日有

貴人至吾當避之女以告其家凌晨卽治供具以俟徐爲田主戒期收租三牲之饗常例也獨此日向晡矣猶不命席徐屢催促佃因述狐昨語云俟貴人徐目汪曰貴人者此也可進食佃不得已進食畢會雨下徐肩輿先返汪留宿佃家而所謂貴人者竟終杳然佃亦竊意其非他矣請汪爲文諭之汪卽夜挑燈起草命佃焚焉而崇遂絕後汪以嘉慶元年成進士用庶常散館改禮部經術爲一時之冠其婚於徐也由外舅擇壻得之亦可謂能相士者矣

查金榮幼失怙家故貧依伯父以生視猶己子金榮事之亦曲盡其道伯父卒時尙未有孫不瞑家人徧舉所未了者撫之猶

視金榮曰是得無爲兄未舉子力不能納妾故乎姪請任之乃
瞑金榮遂百方措置自爲傭積其直以炊卒納妾生三子焉金
榮亦生一子後皆長授室兄見已食指繁值金榮他出析爨居
金榮歸已無及乃悉以己所得與兄曰兄子多業太少不能自
給弟一子易以活也兄不可金榮卒與之今里中人言友于者
猶稱道金榮不置也

苟璜善拳勇得少林內堂法以行五人皆稱之爲苟老五嘗往
來江淮間爲行賈作標客有太平宋氏子以厚貲禮致之館其
家久之宋云此間有老翁不知何許人嘗踣數十人曷訪焉苟
欣然偕宋往至則老翁方以白疊布拭茶壺傲睨若弗見兩人

頗不平宋因請翁出其技翁謝不能苟起舞滾雕法捷如風雨
猱而入思有以踣之忽掌痛不可忍蓋已爲翁所暗擊而宋固
未之見也翁乃斟壺中茗飲苟曰勞矣請少以解煩苟手戰至
不能承甌茗盡覆乃辭而出宋方尤苟之怯翌日苟卽託故歸
杜門謝客不復出亦不以技傳人或勸之傳其子曰是非愛吾
子乃所以禍吾子也天地之氣陽生陰殺學此技者不思扶人
而常思踣人其心皆殺機也人未能殺而自殺者多矣吾所見
拳勇士非不得其死則無後職此故也聞者以爲名言後苟年
八十餘卒潛山熊寶泰爲立傳以傳之

葉良田世業農幼失母父繼娶生弟甫周歲父外貿繼母病危

良田年始十三聞桐邑有良醫某一日夜走百三十里請之至病以愈弟長父爲析居良田不敢違也弟中落復與之合爨焉爲二姪娶婦而以其長爲己嗣良田故有妻妻死弟勸之續不肯恐續則自有家累無以分潤及弟也今良田尚存年八十餘矣一農人天性孝友如此煮豆分荆之事乃時見於詩書之族亦獨何哉

吳幼鍾嶽秀歷任藩臬立身端介嘗大書二語於室以自儆曰儼龍見於尸居小心翼翼聽鷄鳴而早起爲善孳孳

忠宣公墓左碑石質甚麤所刊乃胡纘宗記字畫剝落過半其上時有碎金大者如藻細者如星可以剔取比黃金微淡蓋忠義不磨之氣發爲光彩故土花暈碧璀璨人間也

橡樹花在笠下微黃如瓔珞嘉慶間井田阪踏水橋東一橡樹徑尺許忽開淡紅花如木棉而瓔珞穿花下垂若承蓋橋西里餘陳氏宅前橡樹亦然數年屢開居民見慣不以爲怪他處橡樹則否此可補草木狀之所未及

自獨秀山而南土膏皆宜麥居民墾種歲以秋末冬初布子必翻犁其地有江氏子犁至一處土下滲掘之湧泉一勺得魚二尾重數斤烹食極美蓋蛟種也多山之處蛟最爲害古人有掘蛟之法望氣可得惜無習其業者掘而食之使無遺卵也

佛家有金剛不壞之身海內名刹潛山之三祖黃梅之五祖九

華之地藏皆肉身也非眞證道果者不能近時乃有造作肉身之法初死時用滾水浴屍使骨不僵扶掖之起屈其足爲趺坐置於缸而鬲其下布石灰以承屍汁左右臂脇前後腹背以炭幫之加銅絲鈕束其他空處皆塞以炭斫樹爲义承其頰使首不得俯焉於是而覆以缸雖甚暑膚已臘踰三年開視命工修補加漆若金儼然肉身佛矣作僞至此匪夷所思以惑愚民不俟終日有司宜嚴加懲治也

龔揆一少讀書於黃梅山之天池庵嘗過長安嶺有少婦隨行風雨卒至龔以雨蓋贈婦冒雨自歸次日天霽龔獨坐荒寮婦款扉入含睇宜笑備極狎昵龔略不爲動久之婦乃告去曰君

正人也可以代天行化矣龔起闔門則昨所贈蓋在焉張之得素書一卷皆上清符籙驅雷役電之事乃悟婦人爲斗姥也後歲大旱龔稍以其術試之果得甘雨自是每遇蘊隆鄉之人爭走焉輒應歿因祀爲雨師至今雩禱不絕也

以上道光志
陳世鎔分纂

縱陽門三字在城東門內門上徑二尺許涇縣包世臣謂雍容揖讓是山陰家法門字右直稍挺腹不敢直指爲右軍書庾亮持江西節右軍爲從事或庾自書或使王書時右軍年少書勢稍加作用未可知也見藝舟雙楫考安慶城建於宋嘉定十年去晉甚遠附會未能其書爲山陰嫡派則無可訾議

藝舟雙楫
謂在城南

集賢關集賢律院額爲完白山民隸書院內有鶴塚二大隸字
碑相傳爲僧蘭臺書取法山民氣亦寬博五里廟清涼菴額亦
山民書未題欸此外山民四體書石木刻本藏懷寧者鐵硯山
房卽山民家爲其子少白手鈎精刻江海門處有篆書屏聯陳昔凡
處有石刻篆書謙卦及謁余忠宣墓詩爲方小東舊刻舒怡笙
處有小隸書謙及家人兩卦石本其真蹟鄉人雖有收藏已等
鳳毛麟角近日上海有正書局所印寄鶴書及前大共和畫報
所印聯皆僞本

道光間張白也太守救生局聯云中流沈溺始求援曷若走順
風時帆休扯足近水樓臺同仰望切莫立高岸上漫不關心同

治間彭廣鍾令懷寧時其頭門一聯曰莫負他白叟黃童稱吾
父母且留些菜羹豆粥貽我兒孫一涉世一存心胥關至性不
僅以文字見也

小南門江岸同治光緒間發見一鐵鑄跪像土人謂爲宋秦檜
販夫走卒不得生活者或向便溺或持挺痛擊次日多有獲瑞
安黃漱蘭芳體通政爲敬敷書院掌教時一日醉命輿泣其處鞭
策疊下漫罵不絕口逕自忘其手爲紅腫但安慶無岳祠恐非
檜像惟地去元安慶太守韓建墓甚近或後人爲害韓者範亦
未可知鋤奸嫉惡萬古同揆天故留以示警懲與

陳啟常字滄海幼孤貧母胡氏苦節以操勞得疾疾作則氣躁

事有不適必痛責啟常啟常屈膝順受無怨色且指處請擊恐觸骨致母痛爲人傭工得米奉母自食粗糲夏日家僅一蚊帳用被母體冬則離妻爲母溫足斥不去妻性拗有時忤母意啟常每泣勸得感化以勤耕作漸足食一日負母責出語人曰我母責我不若昔之痛其血氣衰乎盡售所有謀墳土復設法購衣棺母旋卒得殯葬如禮後復爲人傭工度日名教之責在士大夫今竟出於鄉愚尤爲難得語曰事父母能竭其力雖曰未學吾必謂之學矣啟常有焉援道光志生記孝丐例錄以勸孝

舒景衡
續纂